

**Sambŭt
Pêtrô
Nchih
Rôh 2**

Nau bôk ăn bu gít lor

Nôm nchih sambŭt dja rnha Pêtrô, păng nchih sambŭt dja klăp lah ta năm 64-67, klăp lah 31 năm jêh Brah Yêsu dâk rêh. Nôk păng nchih sambŭt dja, păng mân lah nar bu nkhât păng boi ma tât jêh (2Pê 1:4), păng nchih sambŭt dja ăn ma dâng lě phung nsing ma Brah Krist. Păng kuăl sambŭt dja sambŭt păng töl bar (2Pê 3:1). Ma nau khlay ta Pêtrô, dẫn uănh ta nau bôk sambŭt Pêtrô rôh 1.

Nau ũch ntrông ta sambŭt dja

Ta sambŭt dja Pêtrô ũch n'hao nuih n'hâm phung nsing, păng đã njrăng ma nau bu nti nklă, păng mboh ma phung nsing, Brah Krist mra plở văch ngă, păng mboh ma nau abă mra geh kêng ma nar Brah Krist plở văch. Păng mboh ma bu ăn gít n'hêl, Nau Kôranh Brah Ngôi jêng tă boh Kôranh Brah nôm ngôi ngă, mâu ôh tă boh bunuyh (2Pê 1:20-21; 3:15-16), păng nti lah, bu moh i gít năl Kôranh Brah, gŭ rêh tâm di ma nau Kôranh Brah ũch đống, bu moh i rông ma Kôranh Brah, rông ma bunuyh chiaog meng đống.

Mboh nau khlay ta nkố ta sambŭt dja

- Nau ôp ueh lăng (1:1-2)

- Nau đã ăn lơ ma jru ta nau nsing ma Brah Yêsu Krist (1:3-11)
- Nau Pêtrô n'tình nôk păng bơi khât, ndrel ma nau khlay ta Nau Kôranh Brah Ngơi (1:12-21)
- Nau n'răng ma phung nôm nti nklă (2:1-22)
- Nau Kôranh Yêsu plố văch (3:1-16)
- Nau n'tình đã n'răng n'glễ dứt (3:17-18)

Nau ôp ueh lăng

¹ Sambăt gáp Simôn i bu kuăl Pêtrô nchih. Gáp bunuyh sôm kơl jan kar ma* Brah Yêsu Krist, ndrel ma i kôranh oh mon Păng, dẫn ôp nau ueh lăng khân ay may i lể sớ đơn jêh nau nsing ma Păng i dứt khlay, i tâm ban ma nau nsing hên. Bân lể sớ đơn jêh nau nsing i nây tă bơn nau sồng Brah Yêsu Krist i Brah bân, ndrel ma i nôm rklaih bân.* ² Dẫn nau ueh, ndrel ma nau đăp mpăn gũ ta khân ay may lơ ma hô ốk, tă bơn khân ay may lơ ma n'hêl gĩt năl Kôranh Brah, ndrel ma lơ ma n'hêl gĩt năl Brah Yêsu i Kôranh bân nây.

Nau đã ăn lơ ma jru ta nau nsing ma Brah Yêsu Krist

³ Tă bơn nau dơi Kôranh Brah nôm, Păng lể kơl bân ta ăp ntil nau, gay ma bân dơi gũ ngao tâm đi đah nau Păng nôm ứch. Bân sớ đơn nau kơl i nây tă bơn bân gĩt năl Păng, Păng lể kuăl jêh bân jêng bon lan Păng nôm, tă bơn nau chrêk lợp Păng nôm, ndrel ma tă bơn nau ueh Păng

* **1:1** 1:1: 'Bunuyh sôm kơl jan kar ma', mâu lah 'Dăk'. * **1:1** 1:1: Mat 4:18-20; 10:2; Luk 2:11

nơ.^{*} ⁴ Tã bớh nau chrêk lợp, ndrel ma nau ueh Pãng nơh nây, dâng Kôranh Brah ton ăh nau dũt kuông nau dũt khlay ma bân. Pãng ton kớh nây, gay ma nuh n'hâm bân jêng tâm ban ma nuh n'hâm Kôranh Brah, nđáp ma bân klaih bớh nau djơh i tã bớh nau kớnh jan djơh i geh ta neh ntu dja.

⁵ Lah ndri ăh khân ay may nsrôyh ma lể nuh n'hâm, ăh ntop đổng nau geh nuh n'hâm ueh ta nau khân ay may nsing ma Brah Yêsu Krist, jêh ri ăh ntop đổng nau gĩt vât nau Kôranh Brah ứch ta nau geh nuh n'hâm ueh,^{*} ⁶ ăh ntop đổng nau blao mât njrăng sắk ăh gũ di keh ta nau gĩt vât nau Kôranh Brah ứch, ăh ntop đổng nau ăt nuh n'hâm bol lah geh nau jêr ta nau blao mât njrăng sắk ăh gũ di keh, ăh ntop đổng nau gũ ngao tâm di đah nau Kôranh Brah ứch ta nau ăt nuh n'hâm bol lah geh nau jêr,^{*} ⁷ ăh ntop đổng nau tâm rông bắ ndrăng oh nô ta phung nsing ta nau gũ ngao tâm di đah nau Kôranh Brah ứch, jêh ri ăh ntop đổng nau rông ma dâng lể bunuyh ta nau tâm rông bắ ndrăng oh nô ta phung nsing.*

⁸ Lah khân ay may geh dâng lể nau i nây lơ ma hô, lah ndri nau rêh khân ay may geh khlay, geh play ta nau gĩt nắ lơ ma n'hêl Brah Yêsu Krist i Kôranh bân.* ⁹ Yơn ma bu moh i mầu geh ôh dâng lể nau i nây, pãng i nây jêng tâm ban ma bunuyh cheh mắ, uắnh ngai mầu ôh say, jêh ri

* **1:3** 1:3: 1Ti 6:12 * **1:5** 1:5: Mat 5:16; 1Pê 2:12, 15 * **1:6**
 1:6: Gal 5:22 * **1:7** 1:7: Yôh 13:34-35; Rôm 12:10 * **1:8** 1:8:
 Yôh 15:4

lẽ chuêl nau Kôranh Brah jut ăn kloh nau tih i păng lẽ jan ê lor ma sât nsing nơh.*

¹⁰ Ở oh nô ta nau nsing, ăn khân ay may nhơ nau ueh ta nau gũ ngao khân ay may, gay ma bu say Kôranh Brah lẽ kơih khân ay may jêng phung ðon lan Păng nơm ngăn. Lah jan kot nây, nau nsing khân ay may mra hôm nập nâng, mâu ôh roh.* ¹¹ Jêh ri khân ay may mra lạp ta nau Brah Yêsu Krist mât uãnh n'ho ro, ndập ma nau rãm maak, jêng nau mât uãnh i Kôranh bân, i nơm rklaih bân.

Nau Pêtrô ấnh nôk păng bơi khât

¹² Gấp hôm nkah nau i nây ăn ma khân ay may ðađơ, bol lah khân ay may lẽ gĩt jêh nau i nây, ndrel ma lẽ ndjôt nập nau ngăn i bu lẽ ntũm nti ma khân ay may nây nơh kađôi. ¹³ Nôk gấp hôm gũ rêh ta neh ntu dja†, di ma gấp nkah khân ay may ăn khân ay may hôm kah gĩt ðađơ, ¹⁴ yorlah gấp lẽ gĩt jêh, gấp gũ rêh ta neh ntu dja hôm du ðlât đơm, jêh ri gấp khât‡, nau i nây Brah Yêsu Krist i Kôranh bân lẽ nhơ ăn gấp gĩt lor.* ¹⁵ Lah ndri gấp goyh ngăn nkah khân ay may, gay ma khân ay may hôm kah gĩt ðađơ dăng lẽ nau i nây, jêh gấp mâu hôm gũ ôh ta neh ntu dja.

Nau chrêk lơp Brah Yêsu

* **1:9** 1:9: 1Yô 2:9-11 * **1:10** 1:10-11: Rôm 2:7; 2Tê 2:13-15; Hêb 12:18 † **1:13** 1:13: 'Gũ rêh ta neh ntu dja', mâu lah 'Gũ ta chun bok dja'. ‡ **1:14** 1:14: 'Gấp khât', mâu lah 'Bu mra n'groh chun bok sãk jãn gấp'. * **1:14** 1:14: Yôh 21:18-19

16 Nau i hên mboh nkoch ăn khân ay may gít năl nau dơi Brah Yêsu Krist i Kôranh bân, ndrel ma nau Păng mra plở văch nây, mâu ôh di hên mboh nkoch dứt blao nau nklă, yơn ma hên lẹ say nau chrêk lợ Păng nây ma trôm mắt hên nơm. 17 Kôranh Brah Bở nơm lẹ yok Păng ăn Păng nau chrêk lợ ta nôk Kôranh Brah lah ma Păng, ndâp ma nau ang ral hô ngăn: 'Păng dja Kon Gáp i Gáp rông hô ngăn, hô ngăn Gáp răm Păng'†. 18 Hên lẹ tăng jêh bở i nây tă bớh kalơ trôk, nôk hên gũ ndrel ma Păng ta kalơ yôk kloh ueh.

19 Yor ma nau i nây bân lẹ gít lơ ma n'hêl ngăn, dăng lẹ nau ngời mpôl bunuyh ntoyh nau ngời Kôranh Brah kăl e nớh lẹ di ngăn. Ueh ngăn lah khân ay may iăt ngăn nau i nây, yorlah dăng lẹ nau i nây jêng tâm ban ma ùnh sagêng i ngaang ta ntũk ngo n'ho ma tât lôh nar, i mong Brah Krist plở văch lôh ang ta nuih n'hâm bân, jêh ri Brah Krist i rnha 'Mbing A Oi' đống.* 20 Nau i khlay rlau bu ăn khân ay may gít, dăng lẹ nau ntoyh i geh nchih ta Nau Kôranh Brah Ngời, mâu geh ôh bunuyh dah ma mboh nkoch tăng nuih n'hâm păng nơm ứch,* 21 yorlah dăng lẹ nau ntoyh i lôh bớh mpôl bunuyh ntoyh nau ngời Kôranh Brah, mâu ôh di lôh tă bớh nuih n'hâm bunuyh, jêng lôh tă bớh Brah Huêng Ueh i kloh ueh nsũk nsôr nuih n'hâm khân păng i nây.

† 1:17 1:17: Mat 17:5; Mar 9:7; Luk 9:35 * 1:19 1:19: Rôm 13:12; NTM 10:7; NMO 119:105 * 1:20 1:20-21: Rôm 15:4; 2Ti 3:15-16

2

Phung nơm nti nklă

¹ Kăl e nơh geh mpôl bunuyh ntơyh nklă nau ngoi Kôranh Brah gũ ndrel ma phung Israel đổng. Kơt ndri đổng mra geh nơm nti nklă ta phung khân ay may. Khân păng mra nti nklă blao hô ngăn, yơn ma nau nti i này njũn bunuyh ta nau roh hêng. Khân păng mầu ôh ứch ănh Brah Yêsu Krist i Kôranh bân jan kôranh ma khân păng, bol lah Kôranh Yêsu Krist lể chuai khân păng nơm bơh nau tih, ndri dăng khân păng mra roh hêng gơnh ro.* ² Jêh ri mra geh ốk bunuyh ta phung nsing tâng nau khơh kler khân păng i này, ndrel ma geh ốk bunuyh mưch nau nti i nau ngăn, yor ma mpôl khân păng i này.* ³ Khân păng kơnh ma prăk hô ngăn, jêh ri mbrôh, gay ma geh prăk khân ay may. Kăl e nơh Kôranh Brah lể ơm mbrôh nkoch nau tể dôi h khân păng, jêh ri nau lơh hêng lơi khân păng mầu ôh kộp jô.

⁴ Bol lah phung tông pãr i lể jan tih kăl e nơh, Kôranh Brah kố mầu yố đổng, Kôranh Brah nklăch khân păng ta ntu brống dũt ngo, kăt krũng khân păng ta ntũk này gũ kộp tăt nar Kôranh Brah phat dôi h tay*.* ⁵ Phung bunuyh đjơh ta neh ntu kăl e nơh kố Kôranh Brah mầu yố đổng, nôk Păng ănh dak lêng dak đơng bũk

* **2:1** 2:1: Mat 7:15; 24:11; Kar 20:29-30; 2Kô 11:13-15 * **2:2**

2:2-3: 1Ti 6:3-5; Yũđ 1:11 * **2:4** 2:4: Bân ăbơ dja mầu hơm gĩt

n'hêl ma nau Pêtrôs nchih ta trong dja, geh bunuyh ăbă mân lah Pêtrôs gĩt ma NNt 6:1-4. * **2:4** 2:4: Yũđ 1:6

dâng lě bunuyh djơh ta neh ntu. Yơn ma Păng hơm rklaih bunuyh pơh nuyh, pham ma Nôê i bunuyh mboh nkoch nau sōng nây đơm.*

⁶ Lōng bon Sôđum, ndrel ma bon Kômôra Kôranh Brah lě tề dôiđ đōng, ănh lêk jêng ũnh buh, i nây jêng nau ntât, Păng ứch nhhơ moh mra geh ta bunuyh djơh ta nar jât năp tay.* ⁷ Yơn ma Kôranh Brah lě rklaih du huê bụ klô rnhă Lũt i bunuyh sōng, i bunuyh rngot ngănh ta nuinh n'hâm yor ma say bunuyh ta nôk nây jan djơh năng ăp nar, tâm đōng ăp ntil.* ⁸ Lũt i bunuyh sōng i nây ăp nar ngănh păng gũ ta nklang phung bunuyh djơh i nây. Jêh ri yor ma păng jêng bunuyh sōng, ta trôm nuinh n'hâm păng geh nau rngot dũt hô tă bơh păng say păng tâng dâng lě nđơ djơh ta phung khănh păng i nây jan. ⁹ Kơt ndri Kôranh Brah blaok bōk loi, ănh klaih bơh nau jêh nau nđơm ma phung i tâng iătt nau Păng, yơn ma phung djơh Păng krũng loi ma tề dôiđ ta nar Păng phat dôiđ ri tay.* ¹⁰ Păng tề dôiđ lơ ma hô ma phung i nđơ jan djơh tâng rnglay săk kơnh, ndrel ma phung i mưch rmot tâm rdâng ma bu moh i jan kôranh ma khănh păng. Dâng lě phung i nây khănh păng n'hi êng săk, ndrel ma dăng bôk hô ngănh, mầu ôh klach ngơi djơh mưch rmot ma nơm êng êng† ta kalơ trôk i geh nau chrêk lơp.* ¹¹ Bol lah

* **2:5** 2:5: 1Pê 3:19-20; 4:6; NNt 7:5-23 * **2:6** 2:6: NNt 19:24-25

* **2:7** 2:7-8: NNt 19:1-22 * **2:9** 2:9: 1Kô 10:13; Hêb 2:17-18; 4:14-16 † **2:10** 2:10: Băn mầu ôh gũt n'hêl nau khlay ta 'Nơm êng êng', yơn ma geh bunuyh ăbă măn lah nau i nây ngơi ma tōng păr. * **2:10** 2:10-11: Yudđ 1:8-9

tông pãr i geh n'hâm suan dǎng, ndrel ma geh nau dơi rlau ma phung i nây, phung tông pãr i nây kỗ mâu bǎnh đổng ngời djơh mưch rmot nơm êng êng kơt nây ta nấp mắt Kôranh Brah. ¹² Yơn ma phung i nây ngời djơh mưch rmot ma ndơ êng êng i khân pǎng mâu gĩt vât, khân pǎng jêng tâm ban ma mpômpa (siũm) i mâu ôh geh nau mân mâu ôh gĩt vât ndơ, i ăn bre ma nhữp nkhât roh hêng, bu mra nkhât roh hêng khân pǎng tâm ban kơt ma mpômpa (siũm) đổng.*

¹³ Nau tễ dôi khân pǎng tay, jêng tâm di ma ndơ djơh khân pǎng jan. Khân pǎng i nây lẽ jan tâng nau kơnh djơh khân pǎng nơm ta ang nôk nar kađôi, gay ma rǎm maak ma khân pǎng nơm đơm. Khân pǎng jêng bunuyh nuih n'hâm bở bóch ǎn khân ay may đit prêng, mbrôh khân ay may nôk khân pǎng gũ nhêt sông sa kuông đah khân ay may.* ¹⁴ Nuih n'hâm khân pǎng ũch ngǎn ma lỏm ur lỏm sai, mâu ôh blao dǎl jan tih. Khân pǎng ũch ngǎn tềk mphỏk phung i mâu lǎng geh nau nsing nập, jêh ri khân pǎng hô ngǎn kơnh geh prǎk ỏk. Dǎng lẽ khân pǎng i nây, Kôranh Brah rtǎp ma khân pǎng!* ¹⁵ Khân pǎng i nây lẽ mǎr lơi trong di, lẽ hiot, jêh ri hǎn tâng trong du huê bu klỏ rnha Balam i kon Bêor, pǎng lẽ nti bu blao ndơm phung Israel kǎl e nơh, jêng bunuyh i kơnh geh prǎk ỏk tǎ bớh bu nkhôm ma jan ndơ djơh.* ¹⁶ Yơn ma bunuyh i nây lẽ geh nau nduih jêh ma nau tih pǎng: Seh

* 2:12 2:12: Yuđ 1:10 * 2:13 2:13: Yuđ 1:12 * 2:14 2:14:

Mat 5:27-28; Eph 5:5; 1Ti 6:10 * 2:15 2:15: NKơ 22:5

lia mâu blaô ngời, jêng blaô ngời tâm ban ma bunuyh, buay păng mâu ăn jan nđơ rluk này.*

¹⁷ Dâng lẽ phung nđơ jan djơh i này tâm ban ma tu dak i lẽ kroh nkông, mâu lah tâm ban ma tũk lêm i sial phũt de rdu, lẽ geh ndrăp jêh ntũk ngo chêk kôlak ngăn ro ma ăn khân păng gũ.*

¹⁸ Khân păng mboh ngời n'hi êng săk dũt nau ngăn, tih ma mâu ôh geh nau khlay. Khân păng têk mphök mpôl i mhe sât nsing mhe klaih boh nau gũ ngao djơh, mpôl i này ũch iăt nau khân păng, yor ma khân păng jă đong nau nđơ kơnh djơh ta nuih n'hâm bunuyh. ¹⁹ Khân păng lah ma mpôl i này: “Lah khân ay may jan tâng nau hên dja, mâu ôh khăch jan tâng nau bu đă bu buay tâm ban ma jan dăk ma nau đă buay i này, dah nơm ũch jan hữ” tih ma khân păng nơm jêng tâm ban ma dăk ma nau tih chrao mâu hóm ôh blaô bah jan tih, yorlah bunuyh jêng tâm ban ma dăk ma dâng lẽ nau i geh nau đơi ma păng nơm.*

²⁰ Khân păng a lor nơh lẽ klaih jêh boh nau djơh ta neh ntu dja tă boh năl Brah Yêsu Krist i Kôranh bân, i nơm năk rklaih bân, jêh ri plở lăp tay ta nau djơh i này du tở jăt. Nau tih đơi ma khân păng, lah ndri nau rêh khân păng i này geh nau jêr rlau ma i boh ntôm nơh jăt.*

²¹ Ueh rlau lah khân păng mâu ôh gĩt năl trong i ăn Kôranh Brah kợp khân păng sổng nơh, đah ma gĩt năl, jêh ri plở jăt kơi tâm rlăch mâu ũch jan tâng nau Kôranh Brah đă i bu lẽ nti ma khân

* **2:16** 2:16: NKơ 22:28-30 * **2:17** 2:17: Yũđ 1:12-13 * **2:19**
2:19: Yôh 8:34; Rôm 6:16 * **2:20** 2:20-22: 1Yô 5:10-12

păng nơh. ²² Nau i geh ta khân păng i nây jêng
đi ngãn ta nau ngơi hôr i bu vay lah:

‘So plở sa hok păng nơm’†

Jêh ri:

‘Sửr lể jêh bu nđũm plở pung tay ta dak bỗk’.

3

Nau Kôranh Yêsu plở vắch

¹ Ở oh nô ta nau nsing i gáp rống, dja jêng
sambũt rờh bar i gáp nchih njuả ản ma khân ay
may. Nau ta trôm sambũt lể bar dja, gáp lể nkah
khân ay may ản khân ay may geh nuh n'hâm
nau mản ueh. ² Khân ay may lơi ôh chuêl dăng
lể nau i mpôl bunuyh ntoyh nau ngơi Kôranh
Brah lể nchih jêh kảl e nơh, dăng lể khân păng i
nây i bunuyh kloh ueh. Lơi chuêl đống nau Brah
Yêsu Krist đả, Păng i Kôranh i nơm Nắk Rklaih
bản, nau đả i nây hên i mpôl kôranh oh mon lể
jêh ntũm nti khân ay may nơh.

³ Ắn khân ay may gũt nau i khlay rlau bu dja:
Ta rnôk n'glể dũt* mra geh bunuyh i gũ ngao
tâng rnglay sắk khân păng nơm kớnh đơm, jêh
ri gớm mứch nau nti i ngãn.* ⁴ Khân păng mra
lah: “Khân ay may lah Brah Yêsu Krist lể ton plở
vắch tay ta neh ntu dja, ah Păng ảbảo dja hỉo?
Ntơm bớh phung u che bản khắt tất ma ảbảo dja
hôm kớ ỏm nắng đơm, nđơ ta neh ntu dja hôm
kớ ỏm, kớ ntơm njęng neh ntu nơh đống, mâu

† 2:22 2:22: Hôr 26:11 * 3:3 3:3: Ta nau tâm rngláp mhe
mớh ma bản, jêh Brah Yêsu hao sắt ta kalớ trớk, tất ma Păng
plở vắch, jêng rnôk n'glể dũt. * 3:3 3:3-4: Mat 24:23-24; 1Ti
4:1-2; Yuđ 1:18-19

ôh say geh nau rgâl!" ⁵ Yơn ma khân păng i này jan lah chuêl, Kôranh Brah njęng trôk, ndrel ma neh ntu jęng tă bôh nau ngơi Păng nơm, kơh neh lôh tă bôh dak, jêh ri kơh gũ ta nklang dak.* ⁶ Jêh ri Păng đōng dak lęng dak đōng gay ma n'groh lơi dāng lể ndrơ ta neh ntu lể phiao. ⁷ Jêh ri tă bôh nau ngơi Kôranh Brah đōng, trôk, ndrel ma neh ntu abao dja, Kôranh Brah lể ndrăp ăn ửnh ma su lơi lể phiao ta nar Păng phat dōih dāng lể bunuyh, ndrăp ma n'groh lơi phung bunuyh đjơh ăn lể phiao.*

⁸ Ở oh nô ta nau nsing i gập rōng, ăn khân ay may kah gĩt nau dja: Ma Kôranh Brah, du nar tâm ban ma 1000 năm, jêh ri 1000 năm tâm ban ma du nar đơm đōng.* ⁹ Kôranh Yêsu mra văch ngăn tâng nau Păng ton i này, Kôranh Brah mâu ôh chuêl mâu ôh jổ ir kơt bunuyh abă mân. Yơn ma Păng ăt nuh ma bân, yorlah Păng mâu ửch ôh ăn du huê bunuyh roh hêng, Păng ửch ngăn ăn dāng lể bunuyh rgâl lơi nuh n'hâm đjơh.* ¹⁰ Nar Kôranh Yêsu văch, bu mâu ôh gĩt lor, jęng tâm ban ma bunuyh ntũng hăn ntũng bu. Nôk này trôk mra lęk lể phiao ndrăp ma dũt nteh, jêh ri dāng lể ntil ndrơ ửnh mra sa lể phiao, jêh ri neh ntu, ndrăp ma dāng lể ndrơ bu jan ta neh ntu nơh bu mra say n'hêl nanế ngăn, gay ma Kôranh

* **3:5** 3:5-6: NNt 7:5-23 * **3:7** 3:7: 1Pê 4:17-19; NTM 21:1 * **3:8**
3:8: NMO' 90:4 * **3:9** 3:9: 1Ti 2:4; Tit 1:1

Brah phat dôih†.*

¹¹ Lah dâng lể ndr i nây mra roh lêk lể phiao kot nây ngă, lah ndr ta nau gũ ngao khân ay may ăn khân ay may jan ăn dứt ueh, ndrrel ma gũ tâm di ma nau Kôranh Brah ếch hô ngă dô!

¹² Ăn khân ay may nsrôyh gũ kốp, jêh ri ăn kớ gay ma nar Kôranh Brah phat dôih nây ăn gơnh tât, jêng nar i trôk mra lêk ỉnh sa lể phiao, jêh ri dâng lể ndr mra roh lêk ta ỉnh lể phiao đống.

¹³ Ndr i dâng bân gũ kốp tât geh trôk mhe, ndrrel ma neh ntu mhe i geh nau ueh nau sớng i lể Păng ton jêh.*

¹⁴ O oh nô ta nau nsing i gập rớng, yorlah khân ay may hôm gũ kốp dâng lể nau i nây, ăn khân ay may geh nuih n'hâm goryh hô ngă, gay ma Kôranh Brah mâu ôh say nau ma nduih ta khân ay may i tâm ban ma nau uk rmao, gay ma Păng say khân ay may gũ rêh đăp mpăn ndrrel Păng hỏ,* ¹⁵ jêh ri ăn khân ay may vât nau dja, nau Kôranh bân ăt nuih ê hỏ Păng plớ văch nây, tă boh Păng ếch bunuyh geh nau rklaih. Kot nây đống, Pôl i oh nô ta nau nsing i gập rớng, păng lể nchih ta sambăt i păng njuăl ăn ma khân ay may nơh, păng nchih tâng ma nau mân gít blao i Kôranh Brah lể ăn jêh ma păng.* ¹⁶ Ấp sambăt i păng lể geh nchih, păng nchih kot i nây dadê

† **3:10** 3:10: 'Nđâp ma dâng lể ndr...phat dôih', ta sambăt i nchih ma ti abă geh nchih tâm tih bắ: 'Nđâp ma dâng lể ndr i geh ta neh ntu mra roh lêk'. * **3:10** 3:10: 1Tê 5:2; Mat 24:29;

NTM 20:11; 21:1 * **3:13** 3:13: Rôm 8:20-22; Eph 1:10 * **3:14** 3:14: Tit 2:13 * **3:15** 3:15: 2Pê 3:9; Rôm 2:4

đồng. Ta sambũt pãng geh nau abã i jêr vât, jan ăn bunuyh i rluk, ndrel ma bunuyh i nsing mâu nập rgâl nau jêr vât jêng tih ma nau khlay ơm, kot ma khân pãng lẽ geh rgâl nau khlay ta Nau Kôranh Brah Ngòi abã êng đổng, kot ndri jan ăn sãk khân pãng nôm n'ho ma roh hêng.

Nau đã njrãng n'glẽ dứt

¹⁷ Ớ oh nô ta nau nsing i gập rỗng, gập lẽ ăn khân ay may lẽ gít dâng lẽ nau i nây jêh, lah ndri ăn khân ay may gũ njrãng sãk, gay ma khân ay may mâu ôh iắt tâng nau nti nklá mpól bunuyh djơh i nây, jêh ri chuêl nau nti ngãn i khân ay may lẽ ndjôt.* ¹⁸ Yơn ma ăn khân ay may lơ ma hô gũ nập ta nau ueh Brah Yêsu Krist, ndập ma ta nau gít nãl Pãng i kôranh bân, i nôm rklaih bân. Jêh ri đãn rnê ma nau chrêk lợp ta Pãng rnôk abơ dja, n'ho ma bảơ n'ho ro. Ớ ăn geh kot nây ngãn ro‡.*

* **3:17** 3:17: 1Kô 10:12 ‡ **3:18** 3:18: 'Ớ ăn geh kot nây ngãn ro', mâu lah 'Amen'. * **3:18** 3:18: Luk 2:11

**Nau Kôranh Brah Ngoi Nau Tâm Rnglăp
Mhe
Mnong, Central: Nau Kôranh Brah Ngoi Nau Tâm
Rnglăp Mhe New Testament**

copyright © 2016 Wycliffe Bible Translators, Inc.

Language: Central Mnong

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

e066eeff-60da-5ff7-9822-f65015bcd247